



Sabtu, 09 Desember 2023
Ogen: Jesaya 33: 15-16



Ngelakoken si Bujur



Kuasa megati erbahansa mbue kalak lupa diri. La igejapna ia mahan bana jadi tuhan nandangi kerina jelma. Ia banci ngerampas sikerajangen kalak, muat kesah kalak janah erbansa kalak dem alu kiniseran. Tapi kai pe ningen, kalak si bage tentu labo ngena ate Tuhan. Kegeluhen manusia Tuhan kap empuna janah lalit hak manusia guna ngkuasai kegeluhen manusia sideban. Hal enda me si terjadi ibas zaman Nabi Jesaya erdahin. Enggo ipersingetina bangsa Juda gelah nggeluh ibas kebujuren tapi la ibegikenna. Emaka reh me ukumen Tuhan man bangsa e, dungna nggo ka mbiar bangsa e erkiteken ukumen Tuhan man bana eme, reh me bangsa-bangsa si nerang bangsa Juda. Tapi ertoto ka bangsa Juda man Tuhan segelah isampati ia ibas serangan bangsa-bangsa sideban.

I je teridah kepe maka belinen keleng ras perkuah ate Tuhan nandangi bangsaNa asangkan nembah ras rawaNa. Emaka Tuhan pe ngerana man bangsa-bangsa si deban kerna kuasaNa ras merawa kempaksa. Ngidah sie, rukur bangsa Juda maka ise pe labo banci lepas arah ukumen Tuhan adi la kin ngelakoken kebujuren ngenca. Kejahaten itadingken bagi nipu, ngaloken sogok, pembunuhan rsd. Kebujuren ilakoken, e ngenca dalam maka banci terkelin dengen ndatken ketenengen ukur.

Wari enda ipersingeti kita kerna hari anti korupsi. Korupsi e me sada persoalen klasik i bas negarata enda. Megati isuaraken memberantas korupsi tapi terjeng slogan ngenca. Guna merangi korupsi tentu arus mengubah budaya. Sebab korupsi enda nggo jadi budaya janah wajar me iakap, arus iubah. Guna ndalanken kebujuren arus kin erperang ras si la bujur. Emaka adi tenang ate nggeluh, ntabeh pertunduh, ntabeh perpan, ula nangko...ula buat si la si kerajangenta.

➤ *Kinibujuren kap singkawali geluhita*